

## L'oustau de Janet dóu Bournas

L'oustau dóu Bournas pounchejavo d'un trau à l'endebas dóu vilage, parié à-n-un roucas vièu. Lou vieiounge de si lauso lou mesclavo au païsage clapassié

De proche, pichòti fenestro e pourtarasso semblavon escoundre quauqui secrèt. Aparavon soulamen de la fré.

A l'entour ren mudavo. La lougiero tubèio oulourouso de la sueio e lou fuma espès escapa de la tèulisso èron pamens marco d'ome e de bèsti. A l'endavans, la porto s'abardanavo e crussisié coume uno carello rouvihado. L'intrado dounavo dins l'estable. Un sòu de terro batudo s'amagavo souto li bouto alignado, li bos empiela, lis óutis gausi. Uno rodo de barioto clinado sus soun aisse tirassavo dins un cantoun, demié de ferre vièi, de banasto routo, e un amoulounage de paio. En founs, dos vaco mastegavon d'aise soun fen de levado tounba d'un rastelié que penjavo en dessus de sa pielo au cotre de la paret. Sus lis àutri muraio plantado de caviho de bos, s'enfourcavon à bódre, sounaio, calèu, lantern, emé tambèn quauqui post coumoulo de clavèu, tenaio, bequeto, secatou, burin... tout acò enmantela de pouso e camela d'estaragno qu'engarlavon un saumié de bos chirouna pèr li verme.

A man senèstro un ridèu de saco, e se marchavo sus li maloun gandoula de la cousino. La chaminèio de dous cairoun e d'un pège d'aubre pèr faudau, ennegri de la fum, engoulouva d'uno flamo claro e drecho, que lecavo lou cadouloun dóu cremascle. Uno oulo negro, de coustat, esperavo l'ouro dóu soupa.

Lou petejamen di busco cremado acoumpagnavo lou balança cascaiaire d'un reloge à repic. Soun cofre trelusènt s'apielavo sus la paret blancasso d'à man gaucho, aubourant un cadran di chifro roumano ounte d'aguïo daurado desgrunavon lis ouro. L'amo de l'oustau vivié aqui dins de bressa regla dóu balancié. La pendulo sèmpe fuguè la coumpagno di vivènt, e soun picadis restavo la lançado de la famiho. Coumoulado de siuen, jamai s'arrestavo, senoun quouro dóu fougau uno vido umano s'enanavo.

Dins lou cantoun, uno pielo pareissié d'un placard abardana. Uno fenèstro estrechouno fasié lume. Dous banc e un parèu de cadiero s'acourdavon em'uno taulo de marrit bos, un pestrin groussan sarravo la porto, e sus la paret de drecho se coutavo un lié mita espalanca, subra d'un escalié de plancho que s'aubouravo rede enjusqu'au saumié ounte penjavon li berigoulo e lou calen de couire au bèu mitan de la fusto blancasso.

Amount dis escalié cracinant, dins la chambro di post mau jouncho, dos marridi paiasso s'espandissien pèr sòu. Un armàri de guingoï s'esquichavo dins un cantoun coume de pòu de geina li fusto dóu planchié. La porto de la paiero semblavo coundanado, soul un fenestroun enarca enluminavo lou cambroun di drole.

Lou mounde de Janet viravo coume uno pouso-raco alentour d'aquèu pasible fougau.

Bernat GIELY